

Forfatter: Blicher, Steen Steensen

Titel: Udrag fra E Bindstouw (DK) (paralleltekst med Rigsmålgengivelse)

Citation: Blicher, Steen Steensen: "Noveller", i Blicher, Steen Steensen: *Noveller*, udg. af Esther Kielberg ; Henrik Ljungberg , Det Danske Sprog- og Litteraturselskab, Borgen, 1991, s. 270. Onlineudgave fra Arkiv for Dansk Litteratur: <https://tekster.kb.dk/catalog/adl-texts-blic03val-shoot-idm140515387092000/facsimile.pdf> (tilgået 09. maj 2021)

Anvendt udgave: Noveller

Fa Brudden kam, aa kieg derued – aa de wa Muorens Sessel –
Hun slow hin Hinne te hin Lohr aalt mæ saa stuer en Ræssel.

»Aa Herreguj! hwa sier A no! to de æ Pie dæ stoer.
Aah Pier! A vinted ætte Dæ i samful ølle Oer.
Mi Faær aa Muer æ begi áøh – hwi skull A go fræ Goren?
Do kam jow ett – Do skrøw jow ett – no ær A gywt mæ Soren.»

»Hwa skull A skryw mæ, Sessellil! mi hower Arm æ henn;
Aa fahr i Krie aa fremmed Lann A ku jow ingen senn.
A æ en Krøvl; de sie Do wal, aa ingen Minnesk notte –
Gud give det, jeg maatte snart herfra til Graven fløtte!»

»Gi Dæ refres!» saah hun »Do skal slet ikke suk faa Brøe!
Saalæng vi Anner haær en Koen, da skal Do ett ii Nøe!
Do ka jo blyww som Do haa' wot i gammel Tie i Goeren!
Kom inh aa sæt Dæ ve wo Skyw! saa ka vi snak mæ Soren!»

Si no ær A en gammel Kaael, aa gor aa utter Foer;
A foh mi Foh aa Klæjermøn i Muoten Jensens Goer.
A fløtte Kyer, A fløtte Hæjst, aa Smotøw sier A ætter;
Aa somti po mi venster Arm A bærer Sessels Dætter.»

Da no den hæ Vihs om den jenarmed Sældaat war ued, saa tow Wolle
Vistisen ve igjen, aa saah: »A skal indda beskryww Jer, hudden de gik
mæ de Oer, A tint dærøwwer i Kjøwwenhawn. A haær inno gjemt de
Brøw, A skrøw hjem, aa no vel A løhs ed faa Jer:

No er A da bløwn Kusk ve en Brandispetter, aa hwi sommersti I
so mæ no, kun A rele ræh Jer hen, faa nærensti A sedder o e Bok, sir
A ud som en Bjøn, faar A haær en Ullenskjøt aa baare Ræwbælle, aa
en laajn Kabus mæ en Ræwhaal i e Nak. Den naadde Frow saah fäst,
te de sku wot en Ræwrump; men saa saah A: »Nej ejs manne Tak, de
passer A et om.»

De vast A haad her, de fäst A kam her, war ejs aa faasto dje Snak:
den naadde Frow wa rejn Tysk i hinne Taahl. En Swønstiæg kaller